

# Haan

'n Wek of wat lie'n har ik mi'j de haan bezeerd  
En ai dee nich broekn könt bi'j nich vö'l weerd.  
Doar stoa'j zo nich bi'j stil, mer 'n heeln dag hei'j ze an de gang  
Joar in joar oet oe lemm' lang

's Moins drekt begeent a, 'n wekker köj nich ofzetn  
en oezulm antrekn köj himmoal wa vegetn  
Hoe mot 't met striekn, neij'n of eerpel scheln  
Nou dat maj mi'j dan wal is veteln  
Dan nem is ambachtsleu, zoas nen metselaar en nen timmerman  
Joa, de hele economie haank van de haan of an  
Wat kan nen tandarts, verpleegster of specialist  
'k Mot ter nich an deenkn at dee de haan mist  
of ne gitarist en nen pianist, möj is besefn  
Radio 3 en 4 kunt ze voort ophefn.

Bint oonze haan dan weerklijk zo apat?  
Och nee, luk butjes met vel dan hei't mees had.  
Der bint kleine haan en dikn en slaankn,  
Grootn en grofn en ok mooie blaankn.  
Veer vinger en nen doem an iedere haand  
Dat spil kan drei'n in hoas iedern staand.  
Nen neigel deran um te knipn en te veerm  
Of met één of ander kunsngrei mooi te bedeerm  
Met krabn dat geet heel bes  
Mer ofbieten hef nooit de bedoeling wes.

Oonze haan verzet 'n hoop weerk mer doarbi'j  
Könt ze ok nog andere dinge dat is levebri'j.  
Kiek; ak zo do bi'j ammoal stil  
Ak an de weg stoa en ik do zo dan begriep ie ok wa wak wil.  
Ak dit do heft te maakn met geeld  
En ai temet had klapt hek oeleu 'n mooi verhaal veteeld.

Ze könt braille leesn ai bleend bint  
Gebaarntaal veur leu dee doofstom zint  
In de keerke vol ik de haan ak bit  
In 'n duustern veuln woor 't lechknöpke zit.

Doar döw ik de haan veur in 't vuur te stekn  
De va hef zich oawer 't het hen strekn  
Vaak moj wat deur de vinger zeen as 't kan  
Joa, kunnige sprekweur hew der van.

Mangs kunt haan ok kwoad ween  
Dan möi nich zo kot in de buurt ween  
'n Lastig keend kan ne kliestert kriegn  
Of um van één in meka hown mer te zwiegn  
De haand kan met 'n woapn umgoan  
Dat hef nog nooit geneen goed doan.  
Ai lange vinger hebt goai scheef  
Want aj nemt wat oe nich heurt bi'j nen deef  
Heel vroger wör oe dan ne haand ofhakt  
Rechtevoort woi der nich hees meer veur oppakt.  
Gelukkig könt haan ok leef ween en zacht  
Nen aai oawer 'n kop, ne knep in de wang  
'n Scholderklop zeg mangs meer as weur  
'n Vreendelijk gebaar gift 't leem' fleur.  
Haand in haand waandelt 'n verliefd paar  
Bi'j zon of moan; ze hoolt van mekaar  
Aj trouwt gieuw ie meka de rechterhaand  
en beloaw ie nen leemlangn baand  
En ai heel oald bint en 't wil nich meer dan  
li'et ze in 'n schoot  
Stil ..... te wochen ..... op 'n dood?

Ik was luk an 't meimern, och op zich weinig weerd  
Mer ja dat kwam, ik har mi'j de haand bezeerd.

G. Värvik-Roerink